

Am End knallt die Peitsch

In Schadat/Lenauheim war mol wieder vill los. Jedes zweiti Jahr veranstalt die Heimatortsgemeinschaft e Busfahrt ins Banat, in der Heidegemeinde is Anfang September zum dritte Mol es Begegnungsfescht „Kinder des Dorfes“ abghal wore. Un es sin vill Leit aus Deitschland kumm, derbei ware awer aa Temeschwarer, Bogaroscher, Grawatzer, Hatzfelder, die rumänisch Bevelkerung – alli mitnaner han se aa die rumänisch Kerwei, also die „Ruga“ gfeiert un sin uf Radna gfahr.

De Vetter Werner Griebel, der Lenauheimer HOG-Vorsitzende, hat kundgetun, dass eigentlich nor beim erschi Mol Werbung gemacht hat gin misse. Zwaa Jahr druf han die meischte Leit vun selwer angfroot, ob nit gfahr werd un heier war schun recht grosses Intresse, noch bevor mer gewisst hat, ob des Fescht eigentlich gstart gin kann, weil sich halts in dem Frujohr die Gemeindeverwaltung geännert hat un e neije Richter dere Ortschaft vorsteht. Doch der Grawatzer Ilie Suciu, der jetzer Richter von Lenauheim, Grawatz un Bogarisch is, nit nor dass er echt schwowisch rede kann, er hat tatkräftich mitgholf, dass des Fescht for alli Teilnehmer unvergesslich bleibt.

Ich han mit villi Leit gered un versproch, dass am End die Peitsch knalle tut, wann iwer des Ganzi gschrieb werd. Was mich sehr beeindruckt hat, war der scheen hergerichti Kulturheimsaal, in dem die Gäscht verkeschticht gin sin. Un alli ware iwerrascht. Anna Maria Ruster stammt aus Bogarosch, wohnt in Augsburg un is mit eem Schadater verheirat: „Mir han traktiert kriet, wie bei eener schwowisch Kerwei: als Vorspeis Lewer- un Blutworscht, Schwartlmaa un Schofbrinse, dernoh sauri Fleischknedlsupp, gfillt Kraut mit Mamaliga, Bratl un Salat, Schokoladi-Tortn un Gfrozenes. Aa am zweite Taa han sich die Tische geboo, es is wieder e anres Menü ufgetischt gin“. Katharina Berta Schütt, is aa e Bogaroscherin sie wohnt in Freiburg. Sie kummt awer immer wieder mit uf Lenauheim un bsucht derbei a ihre Geburtsort: „Wann ich immer wieder do sin, des heescht, dass es mer gfallt, dass ich do gut ufghob sin!“

Un de Vetter Fredi Mühlroth, er find for lauter rede un verzähle mit de ehemalige un heitiche Schadater nitemol richtig Zeit, for all des keschtliche Esse geniesse. In de 70cher Johre war de Vetter Fredi do Richter. Bei jeder Gelegenheit kummt er hem, oft sogar zwaamol im Jahr: „Derhem is derhem! Do kanns in Deitschland noch so scheen un gut sin – trotzdem ke Vergleich zu Schadat!“

Un noch nitemol war zugutsich abgeraamt sin die Musikante vum Temeschwarer Deutsche Theater uf die Biehne. Un wie se anschlaa han, is mer sogar Gänsehaut iwer de Buckel geloff. Weil, korzerhand sin die Schadater ufgsprung un han sich bei grosser Hitz an sellem Tach so richtig beim Walzer – un Polkatanze ins Zeich geleet un ausgetobt. Peter Minnich, wohnt heit in Ingolstadt: „Zum Tanz-mer-mol! Mir misse Platz mache fors Zunachtess! Un beim Tanze kann mer so gut Abspecke! Hodwood! Nochemol Musikante!“

Sowohl de Schadater Richter als aa de Vetter Werner Griebel han sich vorghol, in zwaa Jahr des Fescht wieder zu veranstalte. Werner Griebel: „Es macht Spass. Un es tut mer iwerhaupscht nit leed, dass ich derfor mei Urlaub geopfert han. Wann mer mitkriet, dass die Leit sich gut fiehle un unerhalle, des git gleich Ansporn fors näkshti Mol!“